

四庫全書

史部

欽定四庫全書

史部

欽定續通志卷

二百九十九至
三百二

中書臣 李采履勘

總校官原任侍講臣王燕緒

欽定四庫全書

欽定續通志卷五十九

列傳

宋三

李繼勲

樂元福

趙晁
延溥

郭崇

楊廷璋

宋偓

向拱

王彥超

王全斌

康延澤

王繼濤

高彥暉

李繼勲大名元城人周祖領鎮選隸帳下廣順初補禁軍列校累遷至侍衛步軍都指揮使領昭武軍節度歲餘改領曹州世宗親征淮上令繼勲領兵屯壽州城南進洞屋雲梯攻其城繼勲怠於守禦為其所敗召歸闕出為河陽三城節度議者以為失責帥之義及再幸壽春回左授繼勲右武衛大將軍顯德四年復從世宗南征以功遷左領軍衛上將軍改右羽林統軍六年世宗幸滄州以繼勲為戰擢左廂都部署俄權知邢州恭帝

立授安國軍節度加檢校太傅太祖即位加檢校太尉
平澤潞繼勲朝于行在即以爲昭義軍節度是秋率師
入河東燔平遙縣俘獲甚衆建隆二年又敗并軍獲其
遼州刺史傅延彥及弟延勲來獻乾德二年詔與康延
沼尹訓率步騎萬餘攻遼州太原將郝貴超領兵來援
戰于城下繼勲大敗之州將杜延韜等籍部下兵三千
送款於繼勲遣慕容延忠入奏詔褒之未并人誘契丹
步騎六萬人來取遼州復遣繼勲羅彥瓌郭進曹彬等

領六萬衆赴之大破契丹及太原軍於城下

按十國春秋載契丹

西南面討招使託里以六萬騎來援北漢敗宋兵於石州無繼隆等敗契丹及太原兵事而續通鑑所載與此

並同當以史為正

五年加同平章事開寶初將征河東以繼勲

為行營前軍都部署敗并人於同過河

按宋史本傳作渴河太祖本紀

作銅溫河北漢世家作洞渴河長編作洞過河史文互異考方輿紀要洞渴河在榆次縣東十五里魏收志云洞渴水一出木瓜嶺一出沾嶺一出大廉山一出九里原過晉祠下四水合流故曰同過後各名洞渴今據改

二年太祖親征河東命繼勲為行營前軍都部署三年

移鎮大名太平興國初加兼侍中俄以疾來歸洛陽許

之拜太子太師致仕朝會許綴中書門下班尋卒年六十二贈中書令繼勲與太祖有舊故特承寵遇第繼偓亦有武勇子守恩至如京使守元至北作坊使守徽為崇儀副使

藥元福并州晉陽人善騎射初事邢帥王檀為廳頭軍使以勇敢聞事後唐歷天平軍內外馬軍都指揮使晉天福中為深州刺史開運初契丹陷甘陵圍魏郡師次於河出帝駐軍澶淵契丹陣於城北東西連亘掩城兩

隅登陴望之不見其際元福以左千牛衛將軍領兵居陣東偏契丹盡銳來戰元福與慕容鄴各領二百騎為一隊出關元福奮鐵撾擊契丹斃者數人左右馳突無不披靡契丹兵潰出帝登城見元福三馬皆中流矢擇名馬賜之面授鄭州刺史為權臣所沮止刺原州俄改秦州明年契丹復內侵命與李守貞符彥卿皇甫遇張彥澤等禦之於陽城晉師方列陣設拒馬為行砦契丹以奇兵出陣後斷糧道乏水鑿井輒壞契丹順風揚塵

諸將皆曰彼勢甚銳俟風反與戰元福曰軍中飢渴已甚若俟風反出戰吾屬為虜矣彼謂我不能逆風以戰宜出其不意以擊之此兵家之奇也乃率麾下騎開拒馬出戰契丹大敗追北二十餘里殺獲甚衆以元福為威州刺史會靈武節度王令溫以漢法治蕃部西人苦之共謀為亂三族酋長拓跋彥超石存乜廝褒率衆攻靈州令溫遣人間道入奏乃以河陽節度馮暉鎮朔方召關右兵進討以元福將行營騎兵元福與暉出威州土

橋西遇彥超兵七千餘邀暉行李元福轉戰五十里殺
千級擒三十餘人又遣部校授出令溫護送洛下朔方
距威州七百里無水草號旱海師須齎糧以行至耀德
食盡比明行四十里彥超等衆數萬布為三陣扼要路
據水泉以待暉軍軍中大懼暉遣人賂以金帛求和解
彥超許之使者往復數四至日中列陣如故元福曰彼
知我軍飢渴邀我於險既許和解而日中未決此豈可
信哉欲困我耳遷延至暮則吾黨成擒矣暉驚曰奈何

元福曰彼雖衆而精兵絕少依西山為陣者是也餘不足患請以麾下騎先擊西山兵敵少却舉黃旗為號合勢進擊敗之必矣敵衆果潰舉黃旗以招暉暉軍繼進彥超大敗漢乾祐中從趙暉討王景崇於鳳翔時兵力寡弱不滿萬人蜀兵數萬來援都監李彥從以數千人擊蜀軍衆寡不敵漢軍少却元福領數百騎自後驅之下令還顧者斬衆皆殊死戰大敗蜀兵追至大散關按大散關之捷元福之功居多通鑑載蜀兵援景崇於大散關秋云李彥從襲擊破之不及元福鳳翔平

以功遷淄州刺史周廣順初劉崇引契丹擾晉州命樞密使王峻率兵拒之以元福為西北面都排陣使軍過蒙坑崇夜燒營遁峻令元福與仇超陳思讓追至霍邑既行又遣止之元福謂思讓等曰劉崇召契丹擾邊志在疲弊中國今兵未交而適宜追奔深入以挫其勢諸將畏懦遂止周祖知其事明年因調兵戍晉州謂左右曰去年劉崇之遁若從藥元福之言則無邊患矣俄與曹英向訓討慕容彥超于兗州元福為行營馬步軍都

虞候詔元福自晉州率所部入朝即遣東行勅曹英向
訓不令以軍禮見當時有為宿將築連城以圍充彥超
晝夜出兵元福屢擊敗之遂閉壁不敢出十餘日元福
營柵皆就又穴地及築土山百道攻其城會周祖親征
元福以所部先入羊馬城諸軍鼓譟角進援之以功授
建雄軍節度世宗高平之戰劉崇敗走太原遂縱兵圍
其城以元福為同州節度充太原四面濠砦都部署時
攻具悉備城中危急以糧運不繼詔令班師元福上言

曰進軍甚易退軍甚難世宗曰一以委卿遂部分卒伍為方陣而南元福以麾下為後殿崇果出兵來追元福擊走之師還加檢校太尉移鎮陝州又歷定廬曹三鎮太祖即位加檢校太師卒年七十七贈侍中元福雖老筋骨不衰人或言其氣貌益壯當復領兵必大喜曲致禮待或加以贈遺時稱驍將

趙鼎真定人初事杜重威為列校重威誅屬周祖鎮鄴中鼎因委質麾下周祖開國擢為作坊副使慕容彥超

據兗州叛以晁為行營步軍都監兗州平轉作坊使晁
自以逮事霸府復有軍功而遷拜不滿所望居常怏怏
從征劉崇世宗意在速戰令晁倍道兼行晁私語通事
舍人陳好謙曰賊勢方盛未易敵也宜持重以挫其銳
好謙以所言入白世宗怒曰汝安得此言必他人所教
言其人則舍爾不言當死好謙懼遂以實對世宗即命
并晁械於州獄軍迴始赦之李重進敗吳人于正陽以
降卒三千付晁晁一夕盡殺之世宗不之罪恭帝立加

檢校太傅太祖即位加檢校太尉未幾以疾歸京師卒年五十二太祖甚悼之贈太子太師再贈侍中晁身長七尺儀貌雄偉好聚斂處方鎮以賄聞以周初與宣祖分掌禁軍有宗盟之分故太祖常優禮之再加贈典焉子延溥周顯德中以父任補左班殿直太祖即位為鐵騎指揮使開寶初太祖親征晉陽太宗守京邑延溥以所部為帳下牙軍轉殿前散員指揮使太平興國三年從平太原略地燕薊六軍扈從有後期至者帝怒欲寘

于法延溥遂進曰陛下巡行邊陲以防禦外侮今契丹未殄而誅譴將士若舉後圖誰為陛下戮力乎帝嘉納之師還遷內外馬步軍都軍頭領本州防禦使雍熙四年再知貝州以疾求代代未至卒年五十贈天德軍節度子承彬至內殿崇班承彬子咸一為虞部員外郎咸熙天聖八年進士及第

郭崇應州金城人初名崇威避周祖諱止稱崇父祖俱代北酋長崇弱冠以勇力應募為卒後唐清泰中為應

州騎軍都校晉祖割雲應地入于契丹崇恥事之奮身
南歸歷渾河中路三鎮騎軍都校開運中戍太原會漢
祖起義以崇為前鋒入汴改護聖左第六軍都校領鄆

州刺史改領富州從周祖平河中遷果州防禦使

按東都事

畧作團練使

周祖鎮鄴以崇領行營騎軍兼天雄都巡檢使

乾祐三年從周祖平國難與李筠拒慕容彥超于留子
陂走之以崇補侍衛馬軍都指揮使遣馮道等迎湘陰
公贇於徐州將立之會契丹南侵周祖北征次于瀘州

為六軍推戴樞密使王峻在京師聞變遣崇率七百騎東拒贇遇于睢陽崇陣于牙門外贇懼登門樓呼崇曰汝等何遽至此崇曰澶州軍變遣崇等來衛乘輿非有他也贇召崇升樓崇未敢登即遣道下與語崇乃登具言軍情有屬天命已定贇執崇手泣俛首久之俄而贇所領衛兵都校張令超以衆歸崇贇親將賈王等數怒目視道將害之贇曰汝輩勿草草此非關令公事崇即送贇就館舍廣順初領定武軍節度未幾復升陳州為

節鎮以潁州隸焉命崇為節度加同平章事出鎮澶州周祖不豫促還鎮所世宗立并人侵潞州命崇與符彥卿出固鎮以禦之世宗親征又副彥卿為行營都部署師還加兼侍中移真定尹成德軍節度四年世宗征淮南契丹掠邊崇率師攻下束鹿縣俘獲甚衆五年表求致政不允恭帝立加檢校太師太祖即位加兼中書令崇追感周室恩遇時復泣下監軍陳思誨密奏其狀因言常山近邊崇有異心宜謹備之太祖曰我素知崇篤

於思義蓋有所激發爾遣人覘之還言崇方對賓屬坐
池潭小亭飲博城中晏然太祖笑曰果如朕言未幾來
朝時命李重進為平盧軍節度因重進起兵改命崇為
節制乾德三年卒年五十八贈太師子守璘至洛苑副
使妻即明德皇后之姊也子允恭以父任授殿直至崇
儀副使知常州卒次女為仁宗皇后天聖三年詔贈崇
尚書令兼中書令守璘太尉寧國軍節度允恭太傅安
德軍節度六年又詔追封崇英國公加贈守璘永清軍

節度兼中書令允恭忠武軍節度兼侍中允恭子中庸
左侍禁閤門祇候副使中和娶潁川郡王德彝女為西
染院副使

楊廷璋字溫玉真定人家世素微賤有姊寡居京師周
祖微時欲聘之廷璋謂姊曰此人姿貌異常不可拒姊
從之周祖從漢祖鎮太原廷璋屢省其姊周祖愛其純
謹姊卒留廷璋給事左右及出討三叛入平國難廷璋
數獻奇計即位追冊廷璋姊為淑妃擢廷璋為右飛龍

使廷璋固辭不拜願推恩其父洪裕即令召洪裕赴闕以老病辭就拜金紫光祿大夫真定少尹世宗自瀘淵還京言廷璋有幹才遷客省使俄為河陽巡檢知州事涇帥史懿稱疾不朝周祖命廷璋往代之將行謂之曰懿不就命即圖之廷璋至屏左右以詔書示懿諭以禍福懿即日載路俄聞周主崩廷璋嘔血不食者數日世宗立拜左驍衛大將軍征劉崇以為建雄軍節度在鎮數年頗有惠愛前後率兵入太原境拔仁義高壁等砦

俘獲甚多并人棄沁州二百里退保新城廷璋遂置保
安興同白壁等十餘砦會隰州刺史孫議卒廷璋遣監
軍李謙溥領州事謙溥至并人來攻其城議者以為宜
速救廷璋曰隰州城壁堅完并人奄至未能為攻城具
當出奇以破之乃募敢死士百餘人由間道遣人約謙
溥為內應既至即銜枚夜擊城中鼓譟以出并人大潰
奏至詔褒之世宗自河東還加檢校太保恭帝立加檢
校太傅太祖即位加檢校太尉吏民詣闕請立碑頌功

德太祖命盧多遜撰文賜之李筠起兵潛遣使齎蠟書求援鄰境廷璋獲之械送京師因上攻取之策即下詔委以經略及車駕親征詔廷璋率所部入陰地闕分其勢及平歸鎮是秋來朝改鎮邠州乾德四年移鄜州開寶二年召為右千牛衛上將軍四年卒年六十廷璋美髯長上短下好修容儀雖見小吏未嘗懈惰善待士幕府多知名人在晉州日太祖命荆罕儒為鈐轄罕儒以廷璋周朝近親疑有異志每入府中從者皆持刀劍欲

圖廷璋廷璋推誠待之殊不設脩罕儒亦不敢發終亦無患議者以廷璋在涇州保全史懿陰德之報也廷璋子七人皆不為求官惟表其孤甥安崇勲得西頭供奉官崇勲後唐樞密使重誨子廷璋子垣垣皆進士及第垣至屯田員外郎鹽鐵副使判官垣為都官郎中

宋偓河南洛陽人祖瑤唐天德軍節度兼中書令父廷浩尚後唐莊宗女義寧公主生偓廷浩歷石原房三州刺史晉初為汜水關使張從賓之叛力戰死之偓年十

一以父死事補殿直遷供奉官晉祖嘗事莊崇每偃母
入見詔令勿拜漢祖在晉陽遣其子承訓至洛奉書偃
母結昏即永寧公主也累授北京皇城使漢乾祐初拜
右金吾衛大將軍駙馬都尉隱帝即位授昭武軍節度
按東都事畧
作昭化軍 移鎮滑州周祖舉兵向關時偃在鎮開門

迎謁周祖深德之偃率所部兵從周祖至留子殷隱帝
衛兵悉走投周祖周祖謂偃曰至尊危矣公近親可亟
去擁衛無令驚動偃策馬及御營軍已亂矣廣順初授

左監門衛上將軍世宗征淮南令倭與左龍武統軍趙
贊右神武統軍張彥超前景州刺史劉建於壽州四面
巡檢師還以倭為右神武統軍充行營右廂都排陣使
又為廬州城下副部署吳人大發舟師次東沛州斷蘇
杭之路世宗遣倭領戰艦數百艘襲之又遣大將慕容
延釗率步騎而進水陸合勢大破之世宗嘗次于野有
虎逼乘輿倭引弓射之一發而斃及江北諸州悉平畫
江為界世宗駐迎鑾鎮倭率舟師三千浙江而上巡警

諸郡師還復授滑州節制又移鎮鄧州恭帝立加開府
儀同三司太祖即位加檢校太師遣領舟師巡撫江徼
舒州團練使司超副之李重進謀以揚州起兵僇察其
狀飛章以聞太祖令僇屯海陵以觀重進去就遂從征
揚州為行營排陣使及平以功改保信軍節度使來朝徙
鎮華州會鑿池都城南命僇率舟師數千以習水戰車
駕數臨觀焉五年改忠武軍節度開寶初太祖納僇長
女為后僇本名延渥以父名下字從水上言改為僇三年

徙邠州太平興國初加同平章事二年移定國軍節
度四年從平太原又從征幽州師還歸鎮五年詔知滄
州六年封邢國公俄遷同州九年又為右衛上將軍雍
熙中曹彬等北伐班師命偓知霸州歸闕端拱二年卒
年六十四贈侍中謚莊惠中使護葬偓莊宗之外孫漢
祖之壻女即孝章皇后近代貴盛鮮有其比子元靖至
供備庫使元度至供備庫副使元載元亨並至左侍禁
閣門祇候初孝章寢疾語晉國長公主曰我瞑目無他

憂惟慮族屬不敦睦貽笑於人景德中倖幼子元翰果
詣京府求析家財真宗聞之詔釋勿問仍諭其族屬務
遵先后遺戒焉元度子惟簡為殿直惟易為奉職

向拱字星民懷州河內人始名訓避周恭帝諱改焉少
倜儻負氣漢祖在晉陽招致天下士拱至太原以策干
漢祖不納客于周祖門下及周祖領節鎮署拱知客押
牙周祖即位授宮苑使廣順中出監昭義屯軍并人領
馬步十五都來侵拱與巡檢陳思讓逆戰於虎亭南獲

其帥王璠曹海金又敗其軍於壺關師還會征慕容彥超命為都監即日遣行賊平為陝州巡檢未幾改客省使知陝州會延州高允權卒其子紹基欲求繼襲即自領使務朝廷益禁兵戍守命拱權知州事嘗請禁州民賣軍裝兵器於西人從之所屬部落有侵盜漢戶者拱招其酋帥犒之令誓不敢侵犯召拜左神武大將軍宣徽南院使劉崇入寇遣馬軍樊愛能步軍何徽赴澤州令拱監護之世宗親征拱以精騎居陣中高平之捷以

功兼義成軍節度河東行營前軍都監師還出鎮陳州
先是晉末秦州節度何建以秦成階三州入蜀蜀人又
取鳳州至是宰相王溥薦拱討之乃召拱與鳳翔王景
竝率兵出大散關連下城砦蜀人聞鳳州急將絕周師
糧道拱命排陣使張建雄領兵二千直抵黃花谷又遣
別將領勁卒千人出敵後截其歸路敵果為建雄所敗
奔堂倉又為勁卒所逼合勢掩擊擒其監軍王巒孫韜
等由是劍門之下州邑營砦望風宵遁秦鳳階成平顯

德二年世宗親征淮南以拱權東京留守兼判開封府
事時揚州初平南唐令境上出師謀收復韓令坤有棄
城之意即驛召拱赴行在拜淮南節度依前宣徽使兼
緣江招討使以令坤為副追叙秦鳳功加檢校太尉時
周師圍壽春經年未下江淮草寇充斥吳援兵柵於紫
金山與城中烽火相應而舒蘄和泰復為吳人所據拱
上言徙揚州之師併力攻壽春俟其城下然後改圖進
取世宗從之拱乃封庫付揚州主者復遣本府牙將分

部按巡城中秋毫不犯軍民感悅及師行吳人有負糗糧以送者至壽春與李重進合勢攻其城敗淮南軍于黃蕃砦以為武寧軍節度命領其屬駐鎮淮軍及克壽州以功加同平章事領武寧軍節度淮南平改山南東道節度俄克西南面水陸發運招討使恭帝立加檢校太師河南尹西京留守太祖即位加兼侍中太祖征李筠拱迎謁至汜水言筠逆節久著兵力日盛宜急濟大河踰太行乘其未集誅之緩則勢張難為力矣帝從其

言卷甲倍道趨之筠果率兵南向聞車駕至惶駭走澤
州城守遂見擒乾德初封譙國公拱尹河南十餘年專
治園林第舍好聲妓縱酒為樂府政廢弛羣盜晝劫移
鎮安州命左武衛上將軍焦繼勲代之謂繼勲曰洛久
不治無復效拱為也大平興國初進封秦國公來朝授
左衛上將軍八年代王彥超判左金吾衛仗事雍熙三
年卒年七十五贈中書令咸平初真宗聞拱之後有寒
餒流離者錄其孫懌為國子助教拱子德明至洛苑使

昱大中祥符八年進士出身德明子悅為虞部郎中

王彥超字德昇

據東都事畧補

大名臨清人性溫和恭謹能禮

下士少事後唐魏王繼岌從繼岌討蜀還至渭南會明

宗即位繼岌遇害彥超乃依鳳翔重雲山僧舍暉道人

為徒暉善觀人謂彥超曰子富貴人也安能久居此給

資帛遣之時晉祖帥陝乃召至帳下委以心腹及移鎮

太原將引兵南下遣從事桑維翰求援契丹以彥超從

行天福初累殿前散指揮都虞候領蒙州刺史漢初領

岳州防禦使出為復州防禦使周祖平內難後北征契丹以彥超為行營馬步左廂都排陣使從周祖入汴時自彭門迎湘陰公入繼位會軍變周祖革命即命彥超權知徐州節度未行湘陰公舊校鞏廷美據州起兵

按宋

史作鞏廷美據州叛廷美之于周祖未可稱叛今改

真拜彥超武寧軍節度討之

彥超督戰艦破其水砦乘勝拔之又與樞密使王峻拒劉崇於晉州崇遁去授建雄軍節度俄改河陽三城節度移鎮河中顯德初加同平章事劉崇南寇命彥超領

兵取晉州路東向邀擊從戰高平彥超自陰地關與符
彥卿會兵圍汾州諸將請急攻彥超曰城已危矣旦暮
將降我士卒精銳儻驅以先登必死傷者衆大待之翌
日州將董希顏果降遂趨石州彥超親鼓士乘城數日
下之擒其守將安彥進改忠武軍節度加兼侍中詔率
所部浚胡蘆河城李晏口工未畢契丹萬餘騎來侵彥
超擊敗之宰相李穀征淮南以彥超為前軍行營副部
署敗淮南軍于壽州城下吳兵水陸來援穀退保正陽

吳人躡其後會李重進兵至合勢急擊大敗吳人改京
兆尹永興軍節度移鎮鳳翔恭帝立加檢校太師西面緣
邊副都部署太祖即位加兼中書令代還太祖與彥超
有舊因幸作坊召從臣宴射酒酣謂彥超曰卿昔在復
州朕往依卿何不納我彥超降階頓首曰勺水豈能止
神龍耶當日陛下不留滯於小郡者蓋天使然爾帝大
笑彥超翌日奉表待罪帝遣中使慰諭令赴朝謁未幾
復以為永興軍節度又以其父光祿卿致仕重霸為太

子少傳致仕乾德二年復鎮鳳翔開寶二年為右金吾衛上將軍判衛仗事太平興國六年封邠國公七年彥超語人曰人臣七十致仕古之制也我年六十九當自知止明年表求致仕加太子太師給金吾上將軍祿彥超既得請盡斥去僕妾之冗食者居處服用咸遵儉約雍熙三年卒年七十三贈尚書令開寶初彥超自鳳翔來朝與武行德郭從義白重贊楊廷璋俱侍曲宴太祖從容謂曰卿等皆國家舊臣久臨劇鎮王事鞅掌非朕

所以優賢之意彥超知旨即前奏曰臣無勲勞久冒榮寵今已衰朽願乞骸骨歸邱園臣之願也行德等竟自陳夙昔戰功及履歷艱苦帝曰此異代事何足論翌日皆罷行德等節鎮時議以此許彥超初彥超將致政每戒諸子曰吾屢為統師殺人多矣身死得免為幸必無陰德以及後汝曹勉為善事以自庇及卒諸子果無違者宣化門內有大第園林甚盛不十餘年其家已鬻之矣孫克從咸平元年進士及第亦止於州縣

按宋史此下有張永

德傳改

入貳臣

王全斌并州太原人其父事唐莊宗為岢嵐軍使私畜勇士百餘人莊宗疑有異志召之懼不敢行全斌時年十二謂其父曰此蓋疑大人有他圖願以全斌為質必得釋父從其計果獲全因以隸帳下及莊宗入洛累歷內職同光末國有內難兵入宮城近臣宿將皆棄甲遁去惟全斌與符彥卿等十數人居中拒戰明宗即位補禁軍列校晉初從侯益破張從賓於汜水遷護聖指揮

使周廣順初改護聖為龍捷以全斌為右廂都指揮使
及討慕容彥超于兗州為行營馬步都校顯德中從向
訓平秦鳳遂領恩州團練使俄遷領泗州防禦使從世宗
平淮南復瓦橋關改相州留後太祖即位李筠起兵于
潞州全斌與慕容延釗由東路會大軍進討拜安國軍
節度建隆四年與洺州防禦使郭進等率兵入太原境
進克樂平乾德二年又為忠武軍節度詔命全斌為西
川行營前軍都部署率禁軍步騎及諸州兵由鳳州路

進討蜀拔乾渠渡萬仞燕子二砦遂下興州進拔石圖
魚關白水二十餘砦先鋒史延德進軍三泉敗蜀軍數萬擒
招討使韓保正副使李進既而崔彥進康延澤等逐蜀軍過
三泉遂至嘉陵殺虜甚衆蜀人斷閣道軍不能進全斌議取
羅川路以入延澤潛謂彥進曰羅川路險軍難並進不
如分兵治閣道進與大軍會於深渡彥進白全斌全斌
即命彥進延澤督治閣道數日成遂進擊金山砦破小
漫天砦全斌由羅川趨深渡與彥進會蜀人依江列陣

以待彥進遣張萬友等奪其橋會暮夜蜀人退保大漫
天砦詰朝彥進延澤萬友分三道擊之蜀人悉其精銳
來逆戰又大破之乘勝拔其砦蜀將王審超監軍趙崇
渥遁去復與三泉監軍劉延祚大將王昭遠趙彥韜引
兵來戰三戰三敗追至利州北昭遠渡桔栢江焚梁退

守劍門遂克利州

按續資治通鑑長編據實錄載大漫天之戰全斌擒其寨主王審超監軍

趙崇渥三泉監軍劉延祚全斌傳則云審超崇渥遁去復與延祚等來戰與實錄不合而長編又據實錄書明年正月謀大漫天寨主王審超等則又似同時被擒也傳恐誤自利州趨劍門次益光

全斌會諸將議曰劍門天險古稱一夫荷戈萬夫莫前
諸君宜各陳進取之策侍衛軍頭向韜曰降卒牟進言
益光江東越大山數重有狹徑名來蘇蜀人於江西置
砦對岸有渡自此出劍關南二十里至清強店與大路
合可於此進兵即劍門不足恃也全斌等即欲卷甲赴
之康延澤曰來蘇細徑不須主帥親往且蜀人屢敗併
兵退守劍門莫若諸帥協力進攻命一偏將趨來蘇若
達清強北擊劍關與大軍夾攻破之必矣全斌納其策

命史延德分兵趨來蘇造浮梁於江上蜀人見梁成棄
砦而遁昭遠聞延德兵趨來蘇至清強即引兵退陣於
漢源坡留其偏將守劍門全斌等擊破之昭遠崇韜皆
遁走遣輕騎追獲傳送闕下遂克劍州殺蜀軍萬餘人
四年師次魏城孟昶遣使奉表來降全斌等入成都旬
餘劉廷讓等始自峽路至昶饋遺廷讓等及犒師並同
全斌之至及詔書頒賞諸軍亦無差降由是兩路兵相
嫉蜀人亦構主帥遂不協全斌等先受詔每制置必須

諸將僉議至是雖小事不能即決俄詔發蜀兵赴闕人
給錢十千未行者加兩月廩食全斌等不即奉命由是
蜀軍憤怒人人思亂兩路隨軍使臣常數十百人全斌
彥進及王仁贍等各保庇之不令部送蜀兵但分遣諸
州牙校蜀軍至綿州果叛劫屬邑衆至十餘萬自號興
國軍有蜀交州刺史全師雄者嘗為將有威惠士卒畏
服通以其族赴闕下綿州遇亂師雄恐為所脅乃匿其
家於江曲民舍後數日為亂兵所獲推為主帥全斌遣

都監米光緒往招撫之光緒盡滅師雄之族納其愛女
及橐裝師雄聞之遂無歸志率衆急攻綿州為橫海指
揮使劉福龍捷指揮使田紹斌所敗遂攻彭州逐刺史
王繼濤殺都監李德榮據其城成都十縣皆起兵應師
雄師雄自號興蜀大王開幕府置僚屬署節帥二十餘
人令分據灌口導江邛新繁青城等縣彥進與張萬友
高彥暉田欽祚同討之為師雄所敗彥暉戰死欽祚僅
免賊衆益盛全斌又遣張廷翰張煦往擊之不利退入

成都師雄分兵綿漢間斷閣道緣江置砦聲言欲攻成都自是邛蜀眉雅東川果遂渝合資簡昌普嘉茂榮陵十七州並隨師雄為亂郵傳不通者月餘全斌等甚懼時城中蜀兵尚餘二萬全斌慮其應賊盡殺之未幾劉廷讓曹彬破師雄之衆於新繁師雄退保郫縣全斌仁贍又攻破之師雄走保灌口砦俄虎捷指揮使呂翰為主將所不禮與師雄黨劉澤合衆至五萬果州指揮使宋德威遂州牙校王可璋相繼為亂仁贍等討呂翰於

嘉州翰敗走入雅州師雄病死於金堂推謝行本為主
羅七君為佐國令公與賊將宋德威唐陶鼈據銅山旋
為康延澤所破仁贍又敗呂翰於雅州翰走黎州為下
所殺後丁德裕等分兵招輯賊衆始息全斌之入蜀也
適屬冬暮京城大雪太祖設醺惟於講武殿衣紫貂裘
帽以視事忽謂左右曰我被服若此體尚覺寒念西征
將衝犯霜雪何以堪處即解裘帽遣中黃門馳賜全斌
仍諭諸將以不偏及也全斌拜賜感泣初成都平命參

知政事呂餘慶知府事全斌但典軍旅全斌嘗語所親
曰我聞古之將帥多不能保全功名今西蜀既平欲稱
疾東歸庶免悔吝或曰今寇盜尚多非有詔旨不可輕
去全斌猶豫未決會有訴全斌及彥進破蜀日奪民家
子女玉帛不法等事與諸將同時召還太祖以全斌等
初立功雖犯法不欲辱以獄吏但令中書問狀皆引伏
全斌責授崇義軍節度觀察留後彥進責授昭化軍節
度觀察留後特建隨州為崇義軍金州為昭化軍以處

之仁贍責授右衛大將軍開寶末車駕幸洛陽郊祀召
全斌侍祠以為武寧軍節度謂之曰朕以江左未平慮
征南諸將不遵紀律故抑卿數年為朕立法今已克金
陵還卿節鉞仍以銀器萬兩帛萬匹錢千萬賜之全斌
至鎮數月卒年六十九贈中書令天禧二年錄其孫永
昌為三班奉職全斌輕財重士不求聲譽寬厚容衆軍
旅樂為之用黜居山郡十餘年怡然自得識者稱之子
審鈞廣州兵馬鈐轄審銳供奉官閤門祗候曾孫凱

凱字勝之祖審鈞嘗為永興軍駐泊都監以擊賊死遂
家京兆饒於財凱散施結客日馳獵南山下以踐蹂民
田捕至府時寇準守長安見其狀貌奇之為言全斌取
蜀有勞而審鈞以忠義死當錄其孤遂以為三班奉職
自右侍禁雄州兵馬監押擢閤門祇候定邢趙都巡檢
使按東都事畧作鎮
定邢趙都巡檢使元昊反徙麟州都監嘗出雙烽播
染枝谷遇夏人破之又破帕克沁科爾羅部再戰于伺
候烽前後斬獲以數千計夏人圍麟州乘城拒鬪晝夜

三十一日始解去特遷西頭供奉官代遷邊寇猶欽掠
以為內殿崇班麟州路緣邊都巡檢使與同巡檢張岳
護糧道于沁密埒克寇猝大至與岳相失乃分兵出其
後夾擊之復與岳合斬首百餘級又入兔毛川賊衆三
萬凱以兵六千陷圍流矢中面鬪不解又斬首百餘級
賊自蹂踐死者以千數遷南作坊副使後為并代州鈐
轄管勾麟府軍馬事夏人二萬寇青塞堡凱出蘇頁谷
轉戰四十里至杜牯川大敗之復得所掠馬牛以還經

畧使明鎬言凱在河外九年有功遂領資州刺史久之
召還未及見會甘陵盜起即命領兵赴城下賊平拜澤
州刺史知邠州未幾歷環慶并代定州路副都總管捧
日天武四廂綿州防禦使畧遷侍衛親軍步軍副都指
揮使涇州觀察使又徙秦鳳路辭曰帝諭以嘉勒斯賚
摩正交易阻絕頗有入寇之萌宜安靜以處之凱至與
主帥以恩信撫接遂復常貢召拜武勝軍節度觀察留
後侍衛親軍馬軍副都指揮使卒年六十六贈彰武軍

節度使謚莊恪凱治軍有紀律善撫循士卒平居與均
飲食至臨陣援枹鼓毅然不少假故士卒畏信戰無不
力前後與敵遇未嘗挫衄兔毛川之戰內侍宋永誠哭
于軍中凱劾罷之尤篤好於故舊子緘緘子說字晉卿
能詩善畫尚蜀國長公主官至留後

康延澤父福晉護國軍節度兼侍中天福中延澤以蔭
補供奉官周廣順二年遷內染院副使太祖即位從募
容延釗李處耘平湖湘時荆南高保融卒其子繼冲嗣

領軍事命延澤齎書幣先往撫之且察其情偽及還盡
得其機事因前導大軍入境遂下荆峽以勞授正使乾
德中征蜀為鳳州路馬軍都監破白水閣子二砦進擊
西縣三泉獲韓保正由來蘇路會大軍克劍門及孟昶
降延澤以百騎先入成都安撫軍民盡封府庫而還就
命為成都府都監會全師雄復亂徙為晉州刺史時有
降兵二萬七千諸將懼為內應欲盡殺之延澤請簡老
幼疾病七千人釋之餘以兵衛還浮江而下賊若來劫

奔即殺之未晚諸將不能用俄出兵敗賊黨劉澤三萬人復有王可臻率數郡賊兵來戰延澤擊走之追北至合州又破可臻餘黨謝行本等擒羅七君事平優詔嘉獎就命為東川七州招安巡檢使全斌等得罪延澤亦坐貶唐州教練使開寶中起為供奉官遷左藏庫副使坐與諸姪爭家財失官居西洛卒兄延沼幼隸後唐明宗帳下仕晉歷官隨澤二州刺史仕周累遷蔡齊鄭楚四州防禦使晉潞二州兵馬鈐轄太祖即位討李重進

為前軍馬軍都指揮使建隆四年改懷州防禦使乾德六年命李繼勲等征河東為先鋒都監太祖親征太原以延沼宿將熟練邊事詔領兵屯潞州會以疾歸郡開寶二年卒年五十八

王繼濤河朔人少給事漢祖左右乾祐初補供奉官歷諸司副使仕周為右武衛大將軍淮南平為天長軍使顯德五年遷和州刺史太祖即位為左驍騎大將軍再遷左神武大將軍乾德二年大軍伐蜀為鳳州路壕砦

使興元降王全斌命繼濤權府事孟昶降全斌又遣繼
濤與供奉官王守訥部送昶歸闕守訥白全斌言繼濤
問昶求宮妓金帛全斌遂留繼濤止令守訥送昶俄詔
以繼濤為彭州刺史綿州軍亂劫全師雄為帥率衆攻
彭城繼濤與都監李德榮拒之德榮戰死繼濤身被八
槍單騎走至成都素與通事舍人田欽祚有隙會欽祚
入朝誣奏繼濤以他事太祖驛召繼濤將面質之道病
卒詔曰故彭州刺史王繼濤先登擊賊身被重創優典

未加齋志而歿故階州刺史高彥暉帥師討賊奮不顧
命垂老之年殞身鋒鏑永言痛悼不忘于懷宜各賜其
家粟帛

高彥暉薊州漁陽人仕契丹為瀛州守將世宗北征以
城來降遷耀階二州刺史太祖命師伐蜀為歸州路先
鋒都指揮使全師雄之亂崔彥進遣彥暉與田欽祚共
討之至導江與賊遇賊據隘路設伏竹箐中官軍至遇
伏發遂不利彥暉謂欽祚曰賊勢張大日將暮請收兵

詰朝與戰欽祚欲遁慮賊曳其後乃紿之曰公食厚祿
遇賊畏縮何也彥暉復麾兵進欽祚潛遁去彥暉獨與
部下十餘騎力戰皆死之時年七十餘彥暉老將練習
邊事上聞其沒甚痛惜故並命優恤之

欽定續通志卷二百九十九

欽定四庫全書

欽定續通志卷三百

列傳

宋四

趙普

安易

李崇矩

繼昌

王仁贍

楚昭輔

李處耘

繼隆
繼和

趙普字則平幽州薊人父迥徙常山又徙河南洛陽普

沈厚寡言鎮陽豪族魏氏以女妻之周顯德初永興軍

節度劉詞辟為從事世宗用兵淮上太祖拔滁州宰相
范質奏普為軍事判官宣祖卧疾滁州普朝夕奉藥餌
宣祖由是待以宗分太祖嘗與語奇之時獲盜百餘當
棄市普疑有無辜者啓太祖鞠之獲全者衆淮南平調
補渭州軍事判官太祖領同州節度辟為推官移鎮宋
州表掌書記太祖北征至陳橋被酒卧帳中衆軍推戴
普與太宗排闥入告及受禪以佐命功授右諫議大夫
充樞密直學士車駕征李筠命普與呂餘慶留京師普

願扈從太祖笑曰若勝胄介乎從之普因進策曰陛下
初登寶位光耀神武挫英雄之氣服天下之心在此舉
矣且兵機貴速不尚巧遲若倍道兼行掩其未備所謂
自天而下可一戰而擒也太祖然之及筠誅遷兵部侍
郎樞密副使維揚李重進治城繕兵太祖問普攻取之
策普曰重進昧武侯之遠圖守薛公之下計不過繕修
孤壘以長淮為恃耳況其內乏資儲外無救援以臣愚
見急攻亦取緩守亦取不如速取之矧陛下以順討逆

哉不踰月遂誅重進建隆二年拜樞密使檢校太保仍

加功臣之號

按太祖討李筠李重進用趙普謀功成迅速宋史本傳未載考東都事畧反太宗御

製碑文並長編增

乾德二年范質等三相同日罷以普為門下

侍郎平章事集賢殿大學士

按宋史本傳此下有普拜相太宗署敕事語詳實儀

傳此從刪

帝視如左右手事無大小悉咨決焉普兼監修國

史命薛居正呂餘慶參知政事以副之不宣制班在宰

相後不知印不預奏事不押班但奉行制書而已先是

宰相兼敕皆用內制普相止用敕非舊典也太祖數微

行過功臣家普每退朝不敢便衣冠一日大雪向夜普
意帝不出久之聞扣門聲普亟出帝立風雪中普惶懼
迎拜帝曰已約晉王矣已而太宗至設重褥地坐堂中
熾炭燒肉普妻行酒帝以嫂呼之因與普計下太原普
曰太原當西北二面太原既下則我獨當之不如姑俟
削平諸國則彈丸黑子之地將安逃乎帝笑曰吾意正
如此特試卿爾遂定下江南之策帝曰王全斌平蜀多
殺人吾今思之猶耿耿不可用也普於是荐曹彬為將

潘美副之

按太祖與普議下江南普荐曹彬為將本傳不載據邵氏聞見錄增

五年加右

僕射昭文館大學士俄丁內艱詔起復視事遂勸帝遣

使分詣諸道徵丁壯籍名送京師以備守衛諸州置通

判使主錢穀由是兵甲精銳府庫充實

按東都事畧載太祖召普問息

兵為國家長久之計普對唐季以來戰鬪不息由節鎮

太重君弱臣強惟稍奪其權制其錢穀收其精兵則天

下自安故石守信等罷典禁兵後又有是勸史稱由是

兵甲精銳府庫充實可見藩鎮橫恣時京師徒守空名

而

已開寶二年冬普嘗病車駕幸中書三年春又幸其第

撫問之六年帝又幸其第時錢王俶遣使致書於普及

海物十瓶置於廡下倉卒不及屏帝顧問何物普以實對帝曰海物必佳即命啓之皆瓜子金也普惶恐頓首謝曰臣未發書實不知帝歎曰受之無妨彼謂國家事皆由汝書生爾普為政頗專廷臣多忌之時官禁私販秦隴大木普嘗遣親吏詣市屋材聯巨筏至京師治第吏因之竊貨大木冒稱普鬻都下權三司使趙玘以聞太祖大怒促令追班將下制逐普賴王溥奏解之故事宰相樞密使每侯對長春殿同止廬中帝聞普子承宗

要樞密使李崇矩女即令分異之普又以隙地私易尚
食蔬圃以廣其居又營邸店規利盧多遜為翰林學士
因召對屢攻其短會雷有鄰擊登聞鼓訟堂後官胡贊
李可度受賕亂法及劉偉偽作攝牒得官王洞嘗納賂
可度趙孚授西川官稱疾不上皆普庇之太祖怒下御
史府按問悉抵罪以有鄰為秘書省正字普恩益替始
詔參知政事與普更知印押班奏事以分其權未幾出
為河陽三城節度檢校太傅同平章事

按宋宰輔編年
錄引石林燕語

云故事宰相去位例除本官稍優則進官一等或易東宮三少惟趙韓王以開國舊臣且相十年故以使相罷蓋異也太平興國初入朝改太子少保遷太子太保頗為

盧多遜所毀奉朝請數年鬱鬱不得志會柴禹錫趙鎔等告秦王廷美驕恣將有陰謀竊發帝召問普言願備樞軸以察姦變退又上書自陳預聞太祖昭憲皇太后顧託之事辭甚切至太宗感悟召見慰諭俄拜司徒兼侍中封梁國公先是秦王廷美班在宰相上至是以普數舊再登元輔表乞居其下從之及涪陵事敗多遜南

遷皆普之力也八年出為武勝軍節度檢校太尉兼侍
中帝作詩以餞之普奉而泣曰陛下賜臣詩當刻石與
臣朽骨同葬泉下帝為之動容翌日謂宰相曰普有功
國家朕昔與游今齒髮衰矣不容煩以樞務擇善地處
之因詩什以導意普感激泣下朕亦為之墮淚宋琪對
曰昨日普至中書執御詩涕泣謂臣曰此生餘年無階
上答庶希來世得効犬馬力臣昨聞普言今復聞宣諭
君臣始終之分可謂兩全雍正三年大軍出討幽薊久

未班師普疏諫剴切帝賜手詔優答之四年移山南東
道節度自梁國公改封許國公會詔下親耕籍田普表
求入覲辭甚懇切帝惻然從其請既至慰撫數四普嗚
咽流涕陳王元僖上言乞再用普太宗欲相呂蒙正以
其新進藉普舊德為之表率冊拜太保兼侍中時樞密
副使趙昌言與胡旦陳象輿董儼梁顥厚善會旦令翟
馬周上封事排毀時政普深嫉之奏流馬周黜昌言等
鄭州團練使侯莫陳利用驕肆僭侈大為不法普廉得

之盡以條奏利用坐流商州普固請誅之其嫉惡殫直
皆此類李繼遷之擾邊普建議以趙保忠復領夏臺故
地因令圖之保忠反與繼遷同謀為邊患時論歸咎於普
頗為同列所窺不得專決舊制宰相以未時歸第是歲
大熱特許普夏中至午時歸私第明年免朝謁止日赴
中書視事有大政則召對被疾請告車駕屢幸其第省
之賜予加等普遂稱疾篤三上表求致仕上勉從之以
普為西京留守河南尹依前守太保兼中書令普三表

懇讓賜手詔曰開國舊勲惟卿一人不同他等無至固讓俟首塗有日當就第與卿為別普捧詔涕泣因力疾請對賜坐移晷頗言及國家事上嘉納之普將發車駕幸其第淳化三年以老衰久病令留守通判劉昌言奉表求致政中使馳傳撫問凡三上表乞骸骨拜太師封魏國公給宰相奉料令養疾俟損日赴闕仍遣其弟宗正少卿安易齋詔書賜之又特遣使賜羊酒七月卒年七十一卒之先一歲普生日上遣其子承宗齋器幣鞍

馬就賜之承宗復命未幾卒次歲普已罷中書令故事

無生辰之賜特遣普姪壻左正言直昭文館張秉賜之

禮物普聞之因追悼承宗秉未至而普疾篤

按宋史本傳此下有

趙普遣吏詣上清致禱
事語涉不經人從刪

遂卒上聞之震悼謂近臣曰普

事先帝與朕故舊能斷大事嚮與朕嘗有不足衆所知

也朕君臨以來每優禮之普亦傾竭自效盡忠國家真

社稷臣也朕甚惜之因出涕左右感動廢朝五日為出

次發哀贈尚書令追封真定王賜諡忠獻上撰神道碑

銘親八分書以賜之遣右諫議大夫范杲攝鴻臚卿護喪事賻絹布各五百匹米麴各五百石葬日有司設鹵薄鼓吹如式二女皆笄普妻和氏言願為尼太宗再三諭之不能奪賜長女名志願號智果大師次女名志英號智圓大師初太祖側微普從之游既有天下普屢以微時所不足者言之太祖豁達謂普曰若塵埃中可識天子宰相則人皆物色之矣自是不復言普少習吏事寡學術及為相太祖常勸以讀書晚年手不釋卷每歸

私第闔戶啓篋取書讀之竟日及次日臨政處決如流
既薨家人發篋視之則論語二十篇也普性深沈有崖
谷雖多忌克而能以天下事為己任宋初在相位者多
齷齪循默普剛毅果斷未有其比嘗奉薦某人為某官
太祖不用普明日復奏其人亦不用明日普又以其人
奏太祖怒碎裂奏牘擲地普顏色不變跪而拾之以歸
他日補綴舊紙復奏如初太祖乃悟卒用其人又有羣
臣當遷官太祖素惡其人不與普堅以為請太祖怒曰

朕固不為遷官卿若之何普曰刑以懲惡賞以酬功古
今通道也且刑賞天下之刑賞非陛下之刑賞豈得以
喜怒專之太祖怒甚起普亦隨之太祖入宮普立於宮
門久之不去竟得俞允太宗入弭德超之讒疑曹彬不
軌屬普再相為彬辨雪保證事狀明白太宗嘆曰朕聽
斷不明幾誤國事即日竄逐德超遇彬如舊祖吉守郡
為姦利事覺下獄案劾爰書未具郊禮將近太宗疾其
貪墨遣中使諭旨執政曰郊社可特勿貸祖吉普奏曰

敗官抵罪宜正刑辟然國家卜郊肆類對越天地告于
神明奈何以吉而隳陛下赦令哉太宗善其言乃止真
宗咸平初追封韓王二年詔以普配饗太祖廟庭普子
承宗羽林大將軍知潭鄆二州皆有聲承煦成州團練
使弟固安易安易卒贈工部尚書固至都官郎中

按宋史此

下有安易附傳其建議蜀地用錢事見食貨畧他所數陳皆不足錄今從刪又吳延祚傳改入貳臣

李崇矩字守則潞州上黨人幼孤貧有至行鄉里推服
漢祖起晉陽次上黨史弘肇時為先鋒都校聞崇矩名

召署親吏弘肇總禁兵兼京城巡檢多殘殺軍民左右
引去惟崇矩事之益謹及弘肇被誅獨得免周祖即位
求弘肇親舊於崇矩崇矩上其母弟福素主其家盡籍
財產以付福周祖嘉之以隸世宗帳下顯德初補供奉
官從征高平轉供備庫副使太祖討李筠命率禁軍數
千人屯河陽以所部攻大會砦拔之改澤潞南面行營
前軍都監與石守信高懷德羅彥瓌同破筠衆於碾子
谷及平澤潞先入城收圖籍視府庫因上言曰上黨臣

鄉里也臣父尚豪葬願護櫬歸京師許之會判三司張
美出鎮拜右監門衛大將軍充三司使從征李重進還
為宣徽北院使仍判三司乾德二年代趙普拜樞密使
五年加檢校太傅時劔南初平禁軍校呂翰聚衆構亂
軍多亡命在其黨中言者請誅其妻子太祖疑之以語

崇矩崇矩曰叛亡之徒固當孥戮然案籍合誅者萬餘

人太祖曰朕恐有被其驅率非本心者

按史緯恐有被驅率非其本心

云云亦作崇矩語

乃令盡釋之翰衆聞之亦稍稍自歸未幾翰

敗滅開寶初從征太原會班師命崇矩為後殿次常山
被病帝命乘涼車還京師崇矩叩頭言涼車乃至尊所
御是速臣死爾固辭得免時趙普為相崇矩以女妻普
子承宗相厚善帝聞之不悅有鄭伸者客崇矩門下性
險詖無行崇矩待之漸薄伸因上書告崇矩陰事崇矩
不能自明太祖釋不問出為鎮國軍節度賜伸同進士
出身以為酸棗主簿六年崇矩入為左衛大將軍太平
興國二年河防多決詔崇矩乘傳自陝至滄棣按行河

堤出為邕貴潯賓橫欽六州都巡檢使未幾移瓊崖儋
萬四州都巡檢使時黎賊擾動崇矩悉抵其洞穴撫慰
以已財遺其酋長衆皆懷附代還拜右千牛衛上將軍
端拱元年卒年六十五贈太尉諡元靖崇矩性純厚寡
言尤重然諾史弘肇卒見其子孫必厚禮之振其乏絕
在嶺海四五年恬不以炎荒嬰慮舊涉海者多艤舟以
俟便風或旬餘或彌月崇矩往來皆一日而渡未嘗留
滯士卒僮僕隨者無恙子繼昌

繼昌字世長太祖嘗畀弱弓輕矢教以射法蔭補西頭供奉官太祖欲選尚公主崇矩謙讓不敢當繼昌亦自言不願崇矩亟為繼昌聘婦太祖聞之頗不悅開寶五年遷如京副使淳化中齊饑多盜命為登萊沂密七州都巡檢使至道二年蜀賊平餘黨頗嘯聚拜西京作坊使峽路二十五州軍捉賊招安都巡檢使旋改兵馬鈐轄賊酋喻雷燒者久為民患以金帶遺繼昌繼昌偽納之賊懈不設備因掩殺之進西京左藏庫使咸平三年

王均亂蜀與雷有終上官正石普同受詔進討有終等失利徙繼昌屯鴈橋門進逼魚橋門均脫走繼昌入城嚴戒部下無擾民者獲婦女童幼置空寺中俟事平遣還其家繼昌急領兵追賊至資州聞均梟首乃還以功領獎州刺史俄知青州入掌軍頭引見司景德二年將幸澶州遣先赴河上給諸軍鎧甲契丹請和欲近臣充使乃令繼昌與其使姚東之偕往俄與韓杞同至行在及契丹聘至又命至境首接伴契丹是冬將朝陵寢以

汝州近洛衛兵所駐命知州事兼兵馬鈐轄駕還召歸
出知延州兼鄜延路鈐轄大中祥符元年以自疾求歸
京師入對勞問再三少愈令樞密院傳旨將真拜刺史
復任延安繼昌以疾表求休致改右驍衛大將軍領郡
如故其子遵勗尚萬壽長公主主入對帝問繼昌彊健
能飲食拜連州刺史出知涇州表求兩朝御書及謁拜
諸陵皆許之天禧二年卒年七十二遣中使護櫬以歸
錄其子贊善大夫文晟為殿中丞殿直文旦為侍禁繼

昌性謹厚士大夫樂與之遊為治尚寬所至民懷之任
峽路時與上官正聯職正殘忍好殺嘗有縣胥護芻糧
地遠後期正令斬之繼昌徐為解貸焉鄭伸者早死其
母貧餓嘗詣繼昌乞丐家人競前詬逐繼昌召見與白
金百兩時人稱之

王仁瞻字子豐

據東都
事畧補

唐州方城人少倜儻不事生產

委質刺史劉詞詞遷永興節度署為牙校詞將卒遺表
薦仁瞻材可用太祖素知其名請於世宗以隸帳下太

祖即位授武德使出知秦州改左飛龍使高繼沖請命以仁贍為荆南巡檢使繼沖入朝命知軍府乾德二年召赴闕擢為樞密副使興師討蜀命仁贍為鳳州路行營前軍都監蜀平坐沒入生口財貨殺降兵致蜀土擾亂責授右衛大將軍五年仁贍廉得近臣戚里遣人市竹木秦隴間聯臣筏至京師所過關渡矯稱制免算既至厚結有司悉官市之倍收其直仁贍密奏之帝怒以三司副使范旻戶部判官杜載開封府判官呂端屬吏

旻載具伏罔上為市竹木入官端為秦府親吏喬璉請
託執事者貶旻為房州司戶載均州司戶端商州司戶
判四方館事程德元武德使劉知信翰林使杜彥圭日
騎天武四廂都指揮使趙延溥武德副使竇神興左衛
上將軍張永德左領軍衛上將軍祁廷訓駙馬都尉王
承衍石保吉魏咸信並坐販竹木入官責降罰奉是歲
車駕北巡命仁贍為大內部署七年以政事與僚屬相
矛盾爭辯帝前仁贍辭屈責授右衛大將軍翌日改唐

州防禦使月給奉錢三十萬仁瞻之獲罪也兵部郎中判勾院宋琪及三司判官並降秩先是仁瞻掌計司殆十年恣下吏為奸怙恩寵無敢發者前者發范旻等事中外益畏其口會屬吏陳恕等數人率以瞰察不畏強禦自任因議本司事有不協者朝參日恕獨出班持狀奏其事帝詰之仁瞻屈伏帝怒甚故及於譴而恕等悉獎擢琪與恕等聯事始合謀同奏至帝前而宋琪猶附會仁瞻故亦左降仁瞻既失權勢因怏怏成疾數日卒

年六十六後帝因言及三司財賦謂宰相趙普等曰王
仁瞻領邦計積年恣吏為姦諸場院官皆隱沒官錢以
千萬計朕悉令罷之命使分掌仁瞻再三言恐虧舊數
朕拒之未踰年舊獲千緡者為一二萬緡萬緡者為六
七萬緡其利數倍用度既足儻遇水旱即可免民租稅
仁瞻心知其非頗亦慙悸朕優容之子昭雍為崇儀副
使

楚昭輔字拱辰宋州宋城人

隆平集作
睢陽人

少事華帥劉詞

詞卒事太祖隸麾下以才幹稱甚信任之陳橋師還昭
憲太后在城中太祖憂之遣昭輔問起居昭輔具言士
衆推戴之狀太后乃安太祖即位為軍器庫使親討澤
潞及征淮揚並以昭輔為京城巡檢建隆四年權知楊
州使江表還命鈞校左藏庫金帛數日而畢條對稱旨
開寶四年帝以其能心計拜左驍衛大將軍權判三司
太平興國初拜樞密使三年加檢校太傅從征太原加
檢校太尉俄以足疾請告帝親臨問以所居湫隘命有

司廣之昭輔慮侵民地固讓不願治帝嘉其意賜白金萬兩令別市第昭輔被疾家居近一歲始以石熙載代之昭輔不求解職上亦不忍罷會郊祀畢罷為驍騎衛上將軍逾年卒年六十九贈侍中命中使護其喪歸葬鄉里無子錄其兄子吉為供奉官敏為殿直昭輔性勤介人不敢干以私然頗吝嗇前後賜予萬計悉聚而畜之嘗引賓客故舊至藏中縱觀且曰吾無汗馬勞徒以際會得此吾為國家守爾後當獻于上及罷機務悉以

市善田宅時論鄙之初詞卒昭輔來京師問卜於瞽者
劉悟悟為筮卦曰汝遇貴人見奇表豐下者即汝主也
宜謹事之汝當貴矣及見太祖狀貌如悟言遂委質焉
咸平三年錄弟之子諒為借職大中祥符八年又錄從
孫鼎為右班殿直吉至內殿崇班吉子隨敏子咸並進
士及第隨為太常博士咸屯田員外郎

李處耘字正元

據隆平集補

潞州上黨人父肇仕後唐歷軍

校至檢校司徒從討王都定州契丹來援力戰死晉末

處耘尚幼隨兄處疇至京師遇張彥澤縱士卒剽掠處耘年猶未冠獨當里門射殺數十人衆無敢當者里中賴之漢初折從阮帥府州召置門下委以軍務從阮後歷鄧滑陝邠四節度處耘皆從之顯德中從阮遺表稱處耘可用會李繼勲鎮河陽詔署以右職繼勲初不為禮因會將吏宴射處耘連四發中的繼勲大奇之令升堂拜母稍委郡務俾掌河津處耘白繼勲曰此津往來者懼有姦焉不可不察也居數月果得契丹謀者索之

有與西川江南嶠書即遣處耘部送闕下太祖時領殿
前親軍繼勲罷鎮世宗以處耘隸太祖帳下補都押衙
會太祖出征駐軍陳橋處耘見軍中謀欲推戴遽白太
宗與王彥昇謀召馬仁瑀李漢超等定議始入白太祖
處耘臨機決事謀無不中太祖嘉之授客省使兼樞密
承旨右衛將軍從平澤潞遷羽林大將軍宣徽北院使
討李重進為行營兵馬都監賊平以處耘知揚州大兵
之後境內凋弊處耘勤於綏撫奏減城中居民屋稅民

皆悅服建隆三年詔歸京師老幼遮道涕泣累日不得去拜宣徽南院使兼樞密副使朗州軍亂詔慕容延釗率師討之以處耘為都監入辭帝親授方畧令會兵漢上先是朝廷遣內酒坊副使盧懷忠使荆南覘勢強弱使還具言可取狀遂命處耘圖之處耘至襄州先遣閤門使丁德裕假道荆南請具薪水給軍令軍中入江陵城有不由路及擅入民舍者斬師次荆門高繼沖遣其叔保寅及軍校梁延嗣奉牛酒犒師且來覘也處耘待

之有加諭令翌日先選延嗣大喜令報繼冲以無虞荆
門距江陵百餘里是夕台保寅等飲宴延釗之帳處耘
密遣輕騎數千倍道前進繼冲但俟保寅延嗣之還遽
聞大軍奄至即惶怖出迎遇處耘於江陵北十五里處
耘揖繼冲令待延釗遂率親兵先入登北門比繼冲還
則兵已分據城中荆人束手聽命即調發江陵卒萬餘
人并其師晨夜趨朗州又先遣別將分麾下及江陵兵趨
岳州大破賊于三江口又遇賊帥張從富于澧江擊敗

之逐北至敖山砦賊棄砦走俘獲甚衆處耘釋所俘體肥者數十人令左右分啗之黥其少健者令先入朗州會暮宿砦中遲明延釗大軍繼至黥者先入城言被擒者悉為大軍所啗朗人大懼縱火焚城而潰會朗帥周保權年尚幼為大將汪端劫匿于江南砦僧寺中處耘遣麾下將田守奇率師渡江獲之遂入潭州盡得荆湖之地初師至襄州衢肆鬻餅者率減少倍取軍人之直處耘捕得其尤者二人送延釗延釗怒不受往復三四處耘遂命

斬於市以徇延釗所部小校司義舍於荊州客將王氏家使酒凶恣王氏懣於處耘處耘召義呵責義又譖處耘於延釗至白湖處耘望見軍人入民舍良久舍中大呼求救遣捕之即延釗圍人也乃鞭其背延釗怒斬之由是大不協更相論奏朝議以延釗宿將貫其過譴處耘為淄州刺史處耘懼不敢自明在州數年乾德四年卒年四十七贈宣德軍節度檢校太傅賜地葬於洛陽偏橋村處耘有度量善談當世之務居常以功名為

已任荊湖之役處耘以近臣護軍自以受太祖之過思有以報故臨事專制不顧羣議遂至於貶後太祖頗追念之及開寶中為太宗納其次女為妃即明德皇后也子繼隆繼和自有傳繼恂官至洛苑使順州刺史繼恂子昭遜為供備庫使處疇官至作坊使子繼凝

繼隆字霸圖幼養於伯父處疇及長以父蔭補供奉官處耘貶淄州繼隆亦除籍會長春節與其母入貢復舊官時權臣與處耘有宿憾者忌繼隆有才繼隆因落魄

不治產以游獵為娛乾德中平蜀選為果閬監軍年方弱冠母憂其未更事將輔以處耘左右繼隆曰是行兒自有立豈須此輩願不以為慮母慰而遣之代還夜涉棧道雨滑輿馬偕墜絕澗深十餘丈絙於大樹騎卒馳數十里外取火引綆以出之會征江南領雄武卒三百戍邵州止給刀盾蠻賊數千陣長沙南截其道繼隆率衆力戰賊遁去手足俱中毒矢得良藥而愈部卒死傷者三之一太聞聞其勇敢器重之又與石曦率兵襲袁

州破桃田砦追賊二十里入潭富砦焚其梯衝芻積復從李符督荆湖漕運給征南諸軍吳人以王師不便水戰多出舟師斷餉道繼隆屢與闕種悉善達日馳四五百里常令往來覘候一日中途遇虎射殺之嘗獲吳將部送赴闕至項縣而病斬其首以獻太祖益嘉之與吳人戰流矢中額以所冠胄堅厚得不傷太祖察其才且追念其父欲拔用之謂曰昇州平可持捷書來當厚賞汝時內侍使軍中者十數輩皆伺城陷獻捷會有機事

當入奏皆不願行而繼隆獨請赴闕太宗見其來時城
尚未下甚訝之繼隆度金陵破在旦夕因言在途遇大
風晦暝城破之兆也翌日捷奏至太祖召謂曰如汝所
料矣吳將盧絳聚衆萬餘攻掠州縣命繼隆招來之江
南平録功遷莊宅副使從幸西洛改御營前後巡檢使
從征太原為四面提舉都監與李漢瓊領梯衝地道攻
城西面機石過其旁從卒仆死繼隆督戰無怠討幽州
與郭守文領先鋒破契丹數千衆及圍范陽又與守文

為先鋒大敗其衆于湖翟河南後為鎮州都監契丹侵邊與崔翰諸將禦之初太宗授以陣圖及臨陣有不便衆以帝命不可違繼隆曰事有應變安可預定設獲違詔之罪請獨當也即從宜而行敗之于徐河四年護三交屯兵與潘美出征伐北破靈邱縣盡略其人以歸改定州駐泊都監李繼遷叛命繼隆與田仁朗王侁率兵擊之出銀州北破悉利諸族追奔數十里斬獲尤多又出開光谷西杏子坪破布策布藏族斬其副首領瑪爾

默節五十七人降音蔵族首領托卜巴軍等三千餘衆復
破默碩朗錫幹諸族及濁輪川東克頭川西生擒七十八人
斬首五十九級俘獲數千計引師至監城烏頁久頁四族來
降惟嘉且羅尼十四族怙其衆不下廼與尹憲襲擊之夷其
帳千餘俘斬七千餘級俄改領環州團練使又護高陽關屯
兵從曹彬征幽州率兵助先鋒薛繼昭破其衆數千於固安
南下固安新城進克涿州矢中左股血流至踵獲契丹貴臣
一人彬欲上其功繼隆止之俄而傅潛米信軍敗獨繼隆振

旅而還即命繼隆知定州尋詔分屯諸軍繼隆令書吏盡錄其詔旬餘有敗卒集城下不知所向繼隆按詔給券俾各持詣所部太宗益嘉其有謀三年遷侍衛馬軍都虞候領武州防禦使契丹大入邊出為滄州都部署劉廷讓與敵戰君子館先約繼隆以精卒後殿緩急為援既而敵圍廷讓數重繼隆引麾下兵退保樂壽廷讓力不敵全軍陷沒裁以單騎遁免帝怒追繼隆赴闕令中書問狀既而得釋逾年加領本州觀察使端拱初制授侍衛馬軍都指揮使領

保順節度出為定州都部署初朝議有寇至令堅壁清野
勿與戰一日契丹驟至攻蒲城至唐河護軍表繼忠慄
慨請出師中黃門林延壽等五人以詔書止之繼隆曰
閫外之事將帥得專乃與繼忠出兵戰數合擊走之二
年送芻粟入威虜軍契丹將率騎八萬邀戰繼隆所領
步騎裁一萬先命千人設伏城北十里而與尹繼倫列

陣以待敵

按續通鑑契丹將耶律休哥率精騎數萬邀戰時都巡檢使尹繼倫適領兵繼巡遇之夜

潛兵隔其後契丹軍去大軍四五里繼隆方陣於前以待繼倫從後擊敗之據此則繼倫乃先出師從後逆擊

非與繼隆並列陣以待也與傳互異

衆方食繼隆出其不意擊走之繼隆

追奔過徐河俘獲甚衆嘗有詔廢威虜軍繼隆言梁門

為北面保障不可廢遂城守如故訖為要地淳化初帝

遣使至定州密諭繼隆若契丹復入寇朕當親討繼隆

奏以疆事當責將帥臣雖駑弱誓死為期是歲契丹不

入邊議遂止四年召還太宗面獎之改領靜難軍節度

復遣還屯所時夏州趙保忠與繼遷連謀朝廷患之又

綏州牙校高文岷舉城效順河外藩漢大擾以繼隆為

河西行營都部署尚食使尹繼隆為都監以討之既而
繼隆遁去擒保忠以獻初裨將侯延廣監軍秦翰義請
誅保忠及出兵追之繼隆曰保忠机上肉爾當請於天
子今繼隆遁去千里窮殫艱於轉餉宜養威持重未易
輕舉延廣等服其言會密詔廢夏州隲其城繼隆命秦
翰與弟繼和及高繼勳同入奏以為朔方古鎮賊所窺
覷之地存之可依以破賊并請於銀夏兩州南界山中
增置保戍以扼其衝且為內屬蕃部之障蔽而斷賊糧

運皆不報至道二年白守宗守榮馬紹忠等送糧靈州
為繼遷所邀敗於洛浦河帝聞之怒亟命繼隆為靈環
十州都部署是秋五路討繼遷以繼隆出環州取東關
鎮由赤檜苦井路赴之繼隆以所出道回遠乏水請由
索駝路徑趨賊之巢穴且遣繼和入奏太宗召詰之知
其必敗因遣周瑩齋手詔切責督其進軍赤檜瑩至繼
隆以便宜發兵不俟報與丁罕行十餘日果不見敵而
還諸將失期士卒困乏繼隆素剛因慙憤肆殺戮乃奏

轉運使陳絳梁鼎軍儲不繼並坐削秩三年繼遷以蕃
部從順者衆遣其軍主史乂遇率兵屯橐駝口西北雙
雉以遏絕之執倉族蕃官乂過來告繼隆遣劉承蘊田
敏會乂遇討之斬首數千級獲牛馬橐駝萬計先是受
詔送軍糧至靈州必由旱海路自冬至春而芻粟始集
繼隆請由古原州蔚茹河路便衆議不一繼隆固執論
其事太宗許焉遂率師以進壁古原州令如京使胡守
澄城之是為鎮戎軍真宗即位改鎮安軍節度檢校

太傅踰月召還加同中書門下平章事解兵柄歸本鎮
咸平二年丁內艱起復會秋潦暴集蔡水壞岸繼隆乘
危督士卒補塞自辰訖午衝波稍息四年加檢校太師
王師失利於望都繼隆累表求詣闕面陳邊事因乞自
效俄召還延見詢訪因言醜類侵擾益亦常事願委將
帥討伐不煩親征真宗慰諭之改山南東道節度判許
州景德初契丹大入踰魏郡至河上真宗幸澶淵繼隆
表求扈從命為駕前東西排陣使先赴澶州陳師於北

城外毀車為營敵數萬騎急攻繼隆與石保吉率衆禦之追奔數里及帝至幸北門觀兵召問慰勞見其所部整肅歎賞久之二年還京加開府儀同三司食邑實封詔始下會疾作帝親臨問繼和時為并代鈐轄驛召省視卒年五十六贈中書令諡忠武以其子昭慶為洛苑使從子昭信昭遜並為內殿崇班又錄其門下二十餘人乾興初詔與李沆王旦同配享真宗廟庭繼隆出貴胄感慨自樹深沉有城府真宗以元舅之親不欲煩以

軍旅優游近藩恩禮甚篤然多智用能謙謹保身明德
寢疾欲面見之帝促其往繼隆但詣萬安宮門拜牋終
不入又嘗命諸王詣第候謁繼隆不設湯茗第假王府
從行茶爐烹飲馬昭慶改名昭亮見外戚傳

繼和字周叔少以蔭補供奉官三遷洛苑使淳化後繼
隆多在邊任繼和常從行友愛尤至每令入奏機事繼
隆罷兵柄手錄唐李勣遺戒授繼和曰吾門不墜者在
爾矣初繼隆之請城鎮戎軍也朝廷不果於行繼和面

奏曰平涼舊地山川險阻旁扼夷落為中華襟帶城之
為便太宗乃許焉後復不守咸平中繼和又以為言乃
命版築以繼和知其軍兼原渭儀都巡檢使城畢加領
平州刺使建議募貧民及弓箭手墾田積粟又屢請益
兵朝議未許帝曰苟緩急部署不為濟師則或至失援
矣命繼和兼涇源儀渭鈐轄時繼遷未弭命張齊賢梁
顥經略因訪繼和邊事繼和言鎮戎軍為涇原儀渭北
面扞蔽又為環慶原渭儀秦熟戶所依正當回鶻西涼

六谷吐蕃密布戢裕瑪藏朗嘉諸族之路自置軍以來
克張邊備誠能常用步騎五千守之涇原渭州苟有緩
急會於此軍并力戰守則賊必不敢過故置此城以扼
要路議者以調發芻糧擾民為言此軍所費止出四州
地里非遙輸送甚易又劉琮方興屯田屯田若成積中
有備則四州稅物亦不須得靈州孤壘戍守最苦望比
他州尤加存恤苟選擇英傑使守靈武高官厚賞不吝
先與可保必勝之功朝廷比禁青鹽甚為允愜蕃戎所

賴止在青鹽禁之則彼自困矣五年繼和領兵殺威密

舊作衛埋
今改正

族於天麻川自是壠山外諸族皆恐懼內附

願於要害處置族帳砦柵以為戍守繼和因請移涇原
部署於鎮戎以壯軍勢又請開道環延為應援真宗以
其精心戎事甚嘉之戎人伺警巡弛備一夕塞長壕越
古長城抵城下繼和與都監史重貴出兵禦之賊據險
再突城隍列陣接戰重貴中重創敗走之大獲甲騎有
詔嘉獎別出良藥縑帛牢酒以賜繼和習武藝好談方

略頗知書所至幹治然性剛忍御下少恩部兵終日環
甲常如寇至及較閱之際杖罰過當人多怨焉真宗屢
加勗勵且為覆護之嘗上言保捷軍新到屯所多凶命
者請優賜緡錢苟有亡逸即按軍法舊制凡賜軍中雖
緣奏請者亦以特旨給之帝以繼和峻酷欲軍士感其
惠特令以所奏著詔書中而加賜之且以計情定罪自
有常制不許其請終以邊防之地慮人不為用遣張志
言代還既即路軍中皆恐其復來六年又出為并代鈐

轄將行請對欲領兵去按度邊壘帝曰河東巖險兵甲甚衆賊若入寇但邀其歸路自可致勝不必率兵而往也景德初契丹侵邊徙北平砦車駕駐澶淵繼和受詔與魏能張凝領兵赴趙州躡敵後契丹請和邊民猶未寧又命副將張凝為緣邊巡檢安撫使事平復還并代時朝廷每詔書約束邊事或有當行極斷之語官吏不詳深意即處大辟繼和言其事乃詔自今有云重斷極斷處斬決配之類悉須裁奏先是繼隆卒繼和取以遺

奏得官久之遷西上閤門使未幾擢殿前都虞候領端
州防禦使大中祥符元年卒年四十六贈鎮國軍節度
遣諸王率宗室素服赴弔二子早卒帝以其族盛大諸
姪皆幼令三班選使臣為主家事弟繼恂至洛苑使順
州刺史贈左神武大將軍子昭遜為供備庫使

欽定續通志卷三百

欽定四庫全書

欽定續通志卷三百一

列傳

宋五

曹彬

璨

瑋

琮

潘美

李超

曹彬字國華真定靈壽人父芸成德軍兵馬使彬始生
周歲父母以百玩之具羅於席觀其所取彬左手持干
戈右手持組豆斯須取一印他無所視人皆異之及長

氣質淳厚漢乾祐中為成德軍牙將節帥武行德見其
端懿指謂左右曰此遠大器非常流也周太祖賁妃張
氏彬從母也周祖受禪召彬歸京師隸世宗帳下從鎮
澶淵補供奉官擢河中都監蒲帥王仁鎬以彬帝戚尤
加禮遇彬執禮益恭公府讌集端簡終日未嘗旁視仁
鎬謂從事曰老夫自謂夙夜匪懈及見監軍矜嚴始覺
已之散率也顯德五年使吳越致命訖即還私覲之禮
一無所受吳越人以輕舟追遺之至於數四彬猶不受

既而曰吾終拒之是近名也遂受而籍之以歸悉上送
官世宗強還之彬始拜賜悉以分遺親舊而不留一錢
出為晉州兵馬都監一日與主帥暨賓從環坐於野會
鄰道守將走介馳書來詣使者素不識彬潛問人曰孰
為曹監軍有指彬以示之使人以為給已笑曰豈有國
戚近臣而衣弋絺袍坐素胡牀者乎審視之方信遷引
進使初太祖與禁旅彬中立不倚非公事未嘗造門羣
居讌會亦所罕預由是器重焉建隆二年自平陽歸召

謂曰我疇昔常欲親汝汝何故疎我彬頓首謝曰臣為周室近親復忝內職靖恭守位猶恐獲過安敢妄有交結遷客省使與王全斌郭進領騎兵攻河東平樂縣降其將王超侯霸榮等既而賊將攷進率兵來援三戰皆敗之遂建平樂為平晉軍乾德初改左神武將軍時初克遼州河東召契丹兵六萬騎來攻平晉彬與李繼勳等大敗之於城下俄兼樞密承旨二年冬伐蜀詔以劉光毅為歸州行營前軍副部署彬為都監峽中郡縣悉

下諸將咸欲屠城彬獨申令戢下所至悅服帝聞降詔
褒之俄而全師雄等搆亂擁衆十萬彬復與光毅破之
于新繁卒平蜀亂橐中惟圖書衣衾而已及還以彬清
介廉謹授宣徽南院使義成軍節度使彬入見辭曰征
西將士俱得罪臣獨受賞恐無以示勸帝曰卿有茂功
又不矜伐設有微累仁贍等豈惜言哉懲勸國之常典
可無讓六年遣李繼勲党進率師征太原命為前軍
都監戰洞渦河斬獲甚衆開寶二年議親征太原復命

為前軍都監率兵先往次團柏谷降賊將陳廷山又戰城南薄于壕橋奪馬千餘及太祖至則已分砦四面而自主其北七年將伐江南九月奉詔與李漢瓊田欽祚先赴荆南發戰艦潘美帥步兵繼進又詔以彬為昇州西南路行營馬步軍戰權都部署分兵由荆南順流而東破峽口砦進克池州連克當塗蕪湖二縣駐軍采石磯十一月作浮梁跨大江以濟師大破其軍於白鷺洲又破之於新林港進次秦淮江南水陸十餘萬陳於城

下大敗之浮梁成吳人出兵來禦自三月至八月連破之進克潤州金陵受圍至是凡三時吳人樵采路絕頻經敗衄李煜危急遣其臣徐鉉奉表詣闕乞緩師帝不之省先是大軍列三砦美居守北偏圖其形勢來上太祖指北砦謂使者曰吳人必夜出兵來寇爾亟去令曹彬速成深溝以自固無墮其計中既成吳兵果夜來襲美率所部依新溝拒之吳人大敗奏至帝笑曰果如此長圍中彬每緩師冀煜歸服又使人諭之曰事勢如此

所惜者一城生衆若能歸命策之上也城垂克彬忽稱疾不視事諸將來問疾彬曰余疾非藥石所能愈惟須諸公誠心自誓克城之日不妄殺一人則自愈矣諸將許諾共焚香為誓明日稍愈又明日城陷煜詣軍門請罪待以賓禮請煜入宮治裝彬數騎待宮門外煜之君臣卒賴保全自出師至凱旋士衆畏服無輕肆者及入見刺稱奉敕江南幹事回其謙恭不伐如此初彬之總師也太祖謂曰俟克李煜當以卿為使相副帥潘美預

以爲賀彬曰不然夫是行也仗天威遵廟謨乃能成事
吾何功哉況使相極品乎美曰何謂也彬曰太原未平
爾及還獻俘帝謂曰本授卿使相然劉繼元未下姑少
待之美竊視彬微笑帝覺遽詰所以美以實對帝亦大
笑按王曾筆錄太祖遣彬下江南以平定日授以相印
洎凱旋絕無前命因曲宴彬乃從容陳叙及之史稱
彬謀恭不伐未必邀榮使相且官位非臣下所宜自請當以吏爲正乃賜彬錢二十萬彬

退曰人生何必使相好官亦不過多得錢耳未幾拜樞

密使檢校太尉忠武軍節度使

按宋宰輔編年錄云樞密領節度自彬始實江

南之功也

太宗即位加同平章事

按宋宰輔編年錄云彬初以節度使為樞密使不罷

范鉞至是加同平章事

議征太原召彬問曰周世宗及仍充樞密使即罷范鉞

太祖皆親征何以不能克彬曰世宗時史彥超敗於石

炭關人情驚擾故班師太祖頓兵甘草地會歲暑雨軍

士多疾因是中止太宗曰今吾欲北征何如彬曰國家

兵甲精銳翦太原之孤壘如摧枯拉朽爾太宗意遂決

太平興國三年進檢校太師從征太原加兼侍中八年

為弭德超所誣罷為天平軍節度使

按宋史本傳作太平軍政宗史地理

志天平軍本鄆州
無太平軍今改

旬餘帝悟其譖進封魯國公待之愈

厚雍熙三年詔彬與潘美等北伐分路進討三月敗契
丹于固安破涿州大破其援師于城南四月又與米信
破之于新城及戰于岐溝關諸軍敗績退屯易州臨易
水而營帝聞亟令分屯邊城追諸將歸闕先是賀令圖
等言於帝曰契丹主少母后專政寵倖用事請乘其釁
以取幽薊遂遣彬與崔彥進米信自雄州田重進趨飛
狐潘美出鴈門約期齊舉將發帝謂之曰潘美之師但

先趨雲應卿等以十萬衆聲言取幽州且持重緩行不
得貪利彼聞大兵至必悉衆救范陽不暇援山後矣既
而美先下寰朔雲應等州重進又取飛狐靈邱蔚州
多得山後要地彬亦連下州縣每奏至帝已訝彬進軍
之速及彬次涿州旬日食盡因退師雄州以援餉餽帝
聞之曰豈有敵人在前反退軍以援芻粟失策之甚也
亟遣使止彬勿前急引師緣白溝河與米信軍會按兵養
銳以張西師之勢俟美等盡畧山後地會重進之師而

東合勢以取幽州時彬部下諸將聞美及重進累建功而已握重兵不能有所攻取謀議蜂起彬不得已復裹糧往攻涿州契丹大衆當前時方炎暑軍士乏困糧且盡彬退軍無復行伍遂為所躡而敗詔彬等至闕鞠於尚書省令翰林學士賈黃中等雜治之彬等具伏違詔失律罪責授右驍衛上將軍彥進右武衛上將軍信右屯衛上將軍餘以次黜四年起彬為侍中武寧軍節度使淳化五年徙平盧軍節度真宗即位復檢校太師同

平章事數月召拜樞密使

按長編云真宗即位復平章事召入為樞密使兼侍中罷

龍鉞謂之曰甯司要領尤重必素有名望端亮謹厚處之乃可鎮靜而責成彬以著舊冠樞衡之首咸平

二年被疾帝趨駕臨問手為和藥乃賜白金萬兩問以

後事對曰臣無事可言臣二子材器可取臣若內舉皆堪

為將帝問其優劣對曰璨不如瑋六月薨年六十九帝

臨哭之慟對輔臣語及彬必流涕贈中書令追封濟陽

郡王諡武惠且贈其妻高氏韓國夫人官其親族門客

親校十餘人八月詔彬與趙普配饗太祖廟庭彬性仁

敬和厚在朝廷未嘗忤旨亦未嘗言人過失伐二國秋
毫無所取位兼將相不以等威自異遇士夫於塗必引
車避之不名下吏每曰事必冠而後見居官奉入給宗
族無餘積平蜀回太祖從容問官吏善否對曰軍政之
外非臣所聞也固問之唯薦隨軍轉運使沈倫廉謹可
任為帥知徐州日有吏犯罪既具案逾年而後杖之人
莫知其故彬曰吾聞此人新娶婦若杖之其舅姑必以
婦為不利而朝夕咎詈之使不能自存吾故緩其事然

法亦未嘗屈焉北征之失律也趙昌言表請行軍法及昌言自延安還被劾不得入見彬在右府為請於上乃許朝謁子璩瑋瑋玘珣琮瑋娶秦王女興平郡主至昭宣使玘左藏庫副使玘尚書虞部員外郎珣東上閤門使琮西上閤門副使玘之女即慈聖光獻皇后也芸累贈魏王彬韓王玘吳王諡曰安禧玘之子份傳份見外戚傳傳后兄也榮州刺史諡恭懷

璩字韜光性沉毅善射以蔭補供奉官常從彬征討得

與計議彬以為類已特鍾愛焉遷宮苑副使累擢為鎮
州行營鈐轄徙綏銀夏麟府等州鈐轄契丹入寇屢戰
有功諸將多欲窮追璨慮有伏力止之至道初遷四方
館使知靈州徙河西鈐轄改引進使范廷召將兵出塞
命璨為之副丁外艱起復為廊延路副都部署拜趙州
刺史領武州團練使充麟府濁輪副部署出蕃兵邀繼
遷俘馘甚衆入為樞密都承旨改領亳州團練使契丹
入寇命為鎮定高陽關三路行營都鈐轄領康州防禦

使再知定州明年由天德軍節度入為東京舊城都巡

檢使改鎮彰德轉殿前都指揮使又改保靜武寧忠武

等軍節度使

按隆平集載璵歷官殿前都指揮使宋史失載今據增

在禁衛十餘

年未嘗忤旨天禧三年以足疾授河陽節度使同平章

事卒年七十贈中書令諡武懿璵起貴胄以孝謹稱能

自奮厲以世其家習知韜畧雖輕財不逮其父而敬人

和厚亦有父風子儀官至耀州觀察使

瑋字寶臣父彬歷武寧天平軍節度使皆以瑋為牙內

都虞候補西頭供奉官閤門祇候沉勇有謀通春秋三
傳於左氏尤深李繼遷叛諸將數出無功太宗問彬誰
可將者彬曰臣少子瑋可任即召見以本官同知渭州
時年十九真宗即位改內殿崇班知渭州馭軍嚴明有
部必賞罰立決犯令者無所貸善用間周知虜動靜舉
措如老將彬卒請持喪不允徙知鎮戎軍李繼遷虐用
其國人瑋知其下多怨即移書諸部諭以朝廷恩信撫
養無所間以動諸羌由是康諾爾等族請內附繼遷畧

西蕃還瑋邀擊于石門川俘獲甚衆以鎮戎軍據平地
便於騎戰非中國之利請自隴山以東循古長城塹以
爲限又以弓箭手皆土人習障塞蹊隧曉羌語耐寒苦
官未嘗與兵械資糧而每戰輒使先拒賊恐無以責死
力遂給以境內閒田春秋耕斂州爲出兵護作而蠲其
租繼遷死其子德明請命於朝瑋言繼遷擅河南地二
十年兵不解甲使中國有西顧之憂今國危子弱不即
捕滅後更強盛不可制願假臣精兵出其不意禽德明

送闕下復河西為郡縣此其時也帝方以恩致德明不
報既而西延嘉密阿日威數大族請拔帳自歸諸將猶
豫不敢應瑋曰德明野心不急折其翮後必颺去即日
將騎士薄大都山受降者內徙德明不敢拒遷西上閣
門使為環慶路兵馬都鈐轄兼知汾州按東都事
畧作邠州帝以
瑋習知河北事廼以為真定路都鈐轄領高州刺史瑋
常上涇原環慶兩道圖至是帝以示左右曰華夷山川
城郭險固出入戰守之要舉在是矣因敕別繪二圖以

一留樞密院一付本道俾諸將得按圖計事復為涇原

路都鈐轄兼知渭州與秦翰破章默特族于武延川

按東

都事畧作武
延賊汨川

分兵滅巴藏于平涼於是隴山諸族皆來

獻地瑋築堡山外為籠竿城募土兵守之曰異時秦渭

有警此必爭之地也踰年上表還州事願專督軍旅帝

不欲遽更守臣以密詔敦諭之改引進使英州團練使復

知秦州兼涇原儀渭鎮戎緣邊安撫使時嘉勒斯賚強

盛立遵佐之立遵乃上書求號贊布瑋言贊布汗號也

立遵一言得之何以處嘉勒斯賚邪且復有求漸不可
制廼以立遵為保順軍節度使恩如斯多特都西羌將
舉事必先定約束號為立文法嘉勒斯賚使其舅桑揚
丹與斯敦立文法於離王族謀內寇瑋陰結斯敦解寶
帶予之斯敦感激求自效間謂瑋曰吾父何所使欲吾
首猶可斷以獻瑋曰我知桑揚丹時至汝帳下汝能為
我取桑揚丹首乎斯敦愕然應之後十餘日果斷其首
來因獻南市地南市者秦渭之阨也瑋城之表斯敦為

順州刺史初張信知秦州置四門砦侵奪羌地羌人多
叛去畏得罪不敢出瑋招出之令入馬贖罪還故地至
者數千人每送馬六十匹給采一端築弓門治方牀攘
靜戎三陽定西伏羌永寧小洛門威遠十砦浚濠三百
八十里皆役屬羌廂兵工費不出民伏羌首領斯結博
哩默隆私立文法瑋潛兵滅其帳其年嘉勒斯賚率眾
數萬大入寇瑋迎戰二都谷追奔三十里斬首千餘級
獲馬牛雜畜器械三萬餘遷客省使康州防禦使瑪爾

布據勒立柵野吳谷瑋選募神武軍二百人斬柵獲生
口孳畜甚衆宗噶爾大首領甘遵治兵于潤努爾川瑋
遣間殺遵及破岳矩戡所立文法于楚瑪爾城既而河
州洮蘭安江摩敦邈川當布諸城皆納質為熟戶時瑋
作塹抵燉羅龍燉羅龍西蕃要害地也先是瑋遣小吏
楊知進護賜物通甘州可汗王還過宗噶爾界立遵邀
知進語曰秦州大人直以兵入燉羅龍來幸為我言願
罷兵歲入貢約蕃漢為一家因使種人達實卜琳從知

進來獻馬自是嘉勒斯賚勢威退保磧中不出秦人請刻石紀功有詔褒之天禧三年德明寇柔遠砦都巡檢楊承吉與戰不利以瑋為華州觀察使廊延路副都總管環慶秦等州緣邊巡檢安撫使威齊古密達木等族開瑋至歸附者甚衆拜宣徽北院使鎮國軍節度觀察留後簽書樞密院事宰相丁謂逐寇準惡瑋不附已指為準黨除南院使環慶路都總管安撫使乾興初謫左衛大將軍容州觀察使知萊州瑋以宿將為謂所忌即

日上道從弱卒十餘人不以弓韋矢箠自隨謂敗復華
州觀察使知青州徙天雄軍以彰化軍節度觀察留後
知永興軍拜昭武軍節度使知天雄軍以疾守河陽數
月為真定府定州都總管改彰武軍節度使卒贈侍中
謚武穆瑋用士得其死力平居甚閒暇及師出多奇計
出入神速不可測一日張樂飲僚吏中坐失瑋所在明
日徐出觀事而賊首已擲庭下矣嘗稱疾加砭艾卧閤
內不出會賊至瑋奮起裹創被甲跨馬賊望見皆避去

將兵幾四十年未嘗少失利嘉勒斯賚聞瑋名即望瑋所在東嚮合手加賴契丹使過天雄部勒其下曰曹公在此毋縱騎馳驅也真宗慎兵事心邊事必手詔詰難至十數反而瑋守初議卒無以奪後雖他將論邊事者往往密付瑋處之渭州有告戍卒叛入夏國者瑋方對客奕棋遽曰吾使之行也夏人聞之即斬叛者投其首境上羌殺邊民入羊馬贖罪瑋下令曰羌自相犯從其俗犯邊民者論如律自是無敢犯環慶屬羌田多為邊

人所市致單弱不能自存因沒彼中瑋盡令還其故田
後有犯者遷其家內地所募弓箭手使馳射較強弱勝
者與田二頃再更秋獲課市一馬馬必勝甲然後官籍
之則加五十畝至三百人以上團為一指揮要官處為寨
堡使自墾其地為方田環之立馬社一馬死衆出錢市
馬降者既多因制屬羌百帳以上其首領為本族軍主
次為指揮使又其次為副指揮使不及百帳為本族指
揮使其蕃落將校止於本軍叙進以其習知羌情與地

利不可徙他軍也開邊濠率令深廣丈五尺山險不可
墜者因其峭絕治之使足以限敵後皆以為法天椎卒
有犯盜者衆謂獄具必殺之瑋乃處以常法人或以為
疑瑋笑曰臨邊對敵斬不用命者所以令衆吾非好殺
也治內即安事此乎初守邊時山東知名士賈同造瑋
客外舍瑋欲按邊即同舍邀與俱同問從兵安在曰已
具既出就騎見甲士三千環列初不聞人馬聲同歸語
人曰瑋殆名將也瑋為將不如其父寬然自為一家嘉

祐八年詔配享仁宗廟庭

按宋宰輔編年錄云本朝曹武惠配享太祖武穆配享仁

宗韓忠獻配享英宗文定配享

徽宗父子配享自昔所無也

琮字寶章兄珣娶秦王女興平郡主琮幼時從主入禁

中太宗置膝上拊其背曰曹氏有功我家此亦佳兒也

及彬領鎮海軍節度使補衙內都指揮使仁宗冊琮兄

女為后禮皆琮主辦除衛州團練使琮因奏曰陛下方

以至公屬天下臣既備后族不宜冒恩澤亂朝廷法族

人敢因緣請託願致于理時論稱之出知邠州兼知秦

州度義財為倉庫大積穀古渭冀城生羌屢入鈔邊琮懷以恩信擊牛醢酒犒之多請內屬寶元初會元昊反拜同州觀察使復知秦州上攻守禦三策久之兼同管勾涇原路兵馬定國軍節度觀察留後劉平石元孫敗關輔震恐琮請籍民為義軍以張兵勢於是料簡鄉弓手數萬人賊寇山外還天都劫儀秦屬戶琮發騎士設伏以待之賊遂引去琮欲誘吐蕃犄角圖賊得西川舊賈使諭意而沙州鎮王子遣使奉書曰我本唐甥天子

實吾舅也自党項破甘涼遂與漢隔今願率首領為朝
廷擊賊帝善琮策改陝西副都總管經畧安撫招討副
使拜步軍副都指揮使與夏竦屯鄜州還為馬軍副都
指揮使以疾卒帝臨奠后并出臨喪就第成服贈安化軍
節度使兼侍中諡忠恪琮小心謹畏善贊謁御軍整嚴
死時家無餘貲子佺皇城使嘉州防禦使佺子詩尚魯
國大長公主

潘美字仲詢大名人父璘以軍校戍常山美少侗儻隸

府中典謁嘗語其里人王密曰漢代將終亮臣肆虐四海有改卜之兆大丈夫不以此時立功名取富貴碌碌與萬物共盡可羞也會周世宗為開封府尹美以中涓事世宗及即位補供奉官高平之戰美以功遷西上閤門副使出監陝州軍改引進使世宗將用師隴蜀命護永興屯兵經度西事先是太祖遇美素厚及即位命美先往見執政諭旨中外陝帥袁彥光悍信任羣小嗜殺黷貨且繕甲兵太祖慮其為變遣美監其軍以圖之美

單騎往諭以天命既歸宜修臣職彥遂入朝帝喜曰潘美
不殺袁彥能令來覲成我志矣李重進起兵太祖親征
命石守信為招討使美為行營都監以副之楊州平留
為巡檢以任鎮撫以功授泰州團練使時湖南叛將汪
端既平人心未寧乃授美潭州防禦使嶺南劉鋹數寇
桂陽江華美擊走之溪洞蠻獠自唐以來不時侵畧頗
為民患美窮其巢穴多所殺獲餘加慰撫夷落遂定乾
德二年又從兵馬都監丁德裕等率兵克柳州開寶三

年征嶺南以美為行營諸軍都部署朗州團練使尹崇珂副之進克富川銀遣將率衆萬餘來援遇戰大破之遂克賀州又下昭桂連三州西江諸州以次降美以功移南面都部署進次韶州韶廣之北門也賊衆十餘萬聚焉美揮兵進乘之韶州遂拔斬獲數萬計銀窮蹙遣其臣王珪詣軍門求通好又遣其左僕射蕭淮中書舍人卓惟休奉表乞降美因諭以帝意以為彼能戰則與之戰不能戰則勸之守不能守則諭之降不能降則死

不能死則亡非此五者他不得受美即令殿直冉彥袞
部送灌等赴闕張復遣其弟保興率衆拒戰美即率厲
士卒倍道趨柵頭距廣州百二十里張兵十五萬依山
谷堅壁以待美因築壘休士與諸將計曰彼編竹木為
柵若攻之以火彼必潰亂因以銳師夾擊之萬全策也
遂分遣丁夫數千人持二炬間道造其柵及夜萬炬
俱發會天大風火勢甚熾張衆驚擾來犯美揮兵急擊
之張衆大敗斬數萬計長驅至廣州張盡焚其府庫遂

克之擒張送京師露布以開即日命美與尹崇珂同知
廣州兼市舶使拜山南東道節度五年兼嶺南道轉運使
土豪周思瓊聚衆負海為亂美討平之嶺表遂安八年
議征江南遣美與劉遇等率兵先赴江陵既命美為昇
州道行營都監與曹彬偕往進次秦淮時舟楫未具美
下令曰美受詔提驍果數萬人期於必勝宜限此一衣
帶水而不極度乎遂麾以涉大軍隨之吳師大敗及采
石磯浮梁成吳人以戰艦二十餘鳴鼓汴流來趨利美

麾兵奮擊奪其戰艦擒其將鄭賓等七人及破其城南
水砦分舟師守之奏至太祖遣使令亟徙置戰權以防
他變美聞詔即徙軍是夜吳人果來攻砦不能克進薄
金陵江南水陸十萬陳於城下美率兵襲擊大敗之李
煜危甚遣徐鉉來乞緩師帝不之省仍詔諸將促令歸
附煜遷延未能決夜遣兵數千持鉦鼓譟來拒美率精
銳以短兵接戰因與大將曹彬率士晨夜攻城百道俱
進金陵平以功拜宣徽北院使命副党進攻太原戰于

汾上破之且多擒獲太平興國初改南院使三年加開
府儀同三司四年命將征太原美為北路都招討判太
原行府事部分諸將進討并州遂平繼征范陽以美知
幽州行府事及班師命兼三交都部署留屯以捍北邊
三交西北三百里地名固軍其地險阻為北邊咽喉美
潛師襲之遂據有其地因積粟屯兵以守之自是北邊
以寧美嘗巡撫至代州既秣馬蓐食俄而契丹兵萬騎
來攻近塞美誓眾銜枚奮擊大破之封代國公八年改

忠武軍節度進封韓國公雍熙三年詔美及曹彬崔彥
進等北伐美獨拔寘朔雲應等州詔內徙其民會契丹
兵奄至戰於陳家谷口不利驍將楊業死之美坐削秩
三等責授檢校太保明年復檢校太師知真定府未幾
改都部署判并州加同平章事數月卒年六十七贈中
書令諡武惠咸平二年配饗太宗廟庭子惟德至宮苑
使惟固西上閣門使惟正西京作坊使惟清崇儀使惟
熙娶秦王女平州刺史女即章懷皇后

按宋史本傳云
惟熙女即章懷

皇后也惟熙二字
重出係誤今刪

美後追封鄭王以章懷故也惟吉美

從子累資為天雄軍駐汴都監雖連戚里能以禮法自
飭剔歷中外人咸稱其勤敏云

李超者冀州信都人為禁卒常從潘美軍中主刑刀美
好乘怒殺人超每潛緩之美怒解輒得釋以是全者甚
衆人謂其有陰德子濬字德淵中進士累擢祕書知康
州景德初以虞部員外郎兼侍御史知雜事從幸澶淵
師還命與陳堯咨安撫河北踰年判吏部銓濬居憲府

未再歲帝寵待之擢樞密直學士宰相王旦言濬雖有
剽劇才然驟厯清切時望未允真宗曰朕業已許之矣
尋知開封能檢察隱微京師稱之出知秦州暴疾卒濬
與李宗諤同歲同月後一日生其卒也亦後一日眾以
為異

欽定續通志卷三百一